

Uunga siunnersuut: Kalaallit Nunaata imartaani akisussaaffeqarfiusumi inuussutissarsiornikkut ingerlataqartarneq pillugu Inatsisartut inatsisaat nr. xx, yy 2015-imeersoq.
(Inuussutissarsiornermut, Suliffeqarnermut, Niuernermut Nunanullu allanut Naalakkersuisoq)

Akissuteqaat

(Inuussutissarsiornermut, Suliffeqarnermut Niuernermut Nunanullu allanut Naalakkersuisoq)

Aappassaaneerneqarnera

Naalakkersuisut sinnerlugit Inuussutissarsiornermut ataatsimiititaliaq qutsaviginiarpara inatsisissatut siunnersuut peqqissaartumik misissuataarsimammassuk, ataatsimiititaliamillu siunnersuut akuersissutigineqassasoq inassutigineqarmat.

Inuussutissarsiornermut ataatsimiititaliap isumaliutissiissummini tikkuarsimavaa inatsisissatut siunnersuummi allannguinnissamat pisariaqartitsisoqartoq, Naalakkersuisullu qinnuigalugit siunnersuutip aappassaaneerneqarnissaanut allannguutissanik saqqummiussissasut. Taamaattumik Naalakkersuisut ataatsimiititaliap allannguutissatut siunnersuutaa, kiisalu § 1-imut oqaaseqaataat naapigiarniarlugit aalajangerput, suliallu aappassaaneerneqarnerani allannguutissatut siunnersuuteqarlutik.

Allannguutissatut siunnersuut atortuulersitsinissamat piffissaliussap allanngortinneqarneranik imaqarpoq, taamaasilluni ulloq atortuulersitsiviususaaq 1. januar 2016-imiit 1. juli 2016-imut allanngortinneqarluni.

Kiisalu allannguutissatut siunnersuut aamma § 4, imm. 4-mut tunngatillugu erseqqissaanermik imaqarpoq, Naalakkersuisut inuiaqatigiinni piujuaannartitsinermik nalilersuinermut atatillugu ersarinnerusunik aalajangersagaliorsinnaanerat eqqarsaatigalugu.

Naalakkersuisut allannguutissatut siunnersuummi oqaasertaasumi § 4, imm. 4-mut atatillugu aatsitassanut ikummatissanullu inatsimmi aalajangersakkap matuma assigisaa § 77, imm. 3-miittumi oqaasertat tunngavigisimavaat, taamalu tamatumani aallaavinngortillugu aalajangersakkap atortinneqarnerani allaffissornikkut aqutsinermi periaasiulereersut atortinneqarnissaat.

Kiisalu Naalakkersuisut allannguutissatut siunnersuummi toqqarsimavaat § 2, imm. 4-mik pilersitsinissaq, nalunaarummik suliaqarnikkut taaguutip ”piffissami sivilisujami” qanoq paasineqarnissaata erseqqissaavigisinnaanera periarfissaqartikkumallugu. Isumaliutissiissummi Inuussutissarsiornermut Ataatsimiititaliap inassutigisaanut naapertuuttumik.

Taamatut oqaaseqarlunga Naalakkersuisut sinnerlugit allannguutissatut siunnersuutit saqqummiunneqartut Inatsisartunut suliaassanngortippakka.